

Ebbaluṅa eyi Pawulo gaṅandiihira Abefeeso Enyanjula

Pawulo nj'owaṅandihira *Abefeeso* ebbaluṅa yino mu mwaha ogw'enkaaga oluvanyuma lw'ohusaaliwa hwa Kurisito. Abahugu mu by'Ebbayibbuli baloma baati wayire mu bbaluṅa yino, mubulamo obuheese hy'obuli mu Bakolosaayi, Pawulo nj'owayinandiha. Hamunga ebbaluṅa yino yali yahugenda mu bibbubbu by'abafugiirira Kurisito mu twale eryo. Pawulo aloma ati gaali mu komera aṅa ṅandiihira ebbaluṅa yino (3:1; 4:1; 6:20). Pawulo gaṅandiha Tukikasi n'ebbaluṅa yino owaali hu lugendo ohuhyalira abafugiirira Kurisito mu hibuga Efeeso (6:21-22).

Efeeso hyali hibuga ehibbala mu twale ly'Asiya mu buṅugi w'Abarooma. Era ehibuga Efeeso hyali himanyihene olwa yekaalu y'Arutemi hatonda w'Abayonaani (Bik 19:23-31). Mu hutandiha, abafugiirira Kurisito b'Efeeso baali b'amaani aye oluvanyuma banafuṅa mu hufugiirira hwawe (Hweh 2:1-7).

Mu hitundu ehidaayi ehy'ebbaluṅa yino, Pawulo anyonyola ng'olu Hatonda gatobola abaatu babe era gahena gabanonola ohuṅwa mu bibi byawe era ehyo gahihola n'abita mu Yesu Kurisito. Ageragerania abafugiirira Kurisito ohuba hy'omubiri nga Kurisito

nj'omutwe era nohu nyumba nga Kurisito nj'ebaale ery'omusonda. Mu hitundu ehyohubiri, Pawulo ahubbirisa abafugiirira Kurisito ohuba n'obulamu obusaanira omuutu atya Hatonda.

Ebiri mu bbaluŋa yino mu buupi

1. Pawulo geyanjula era aheesa Abefeeso (1:1-2)
2. Ekolagana ŋagati wa Kurisito n'abafugiirira babe (1:3-3:21)
3. Obulamu w'abafugiirira Kurisito (4:1-6:20)
4. Engohoba (6:21-24)

Enyanjula

¹ Ndiise Pawulo omuhwenda wa Yesu Kurisito olw'ohusiima hwa Hatonda. Pandiihira enywe abagwalaafu, abesiga Yesu Kurisito abali mu hibuga Efeeso.*

² Hatonda Seefe ni Musengwa Yesu Kurisito babanjambire ehisasabirisi era babanje emiyaaya.

Ekabi ohubita mu Kurisito

³ Hujumirya Hatonda Semwana wa Musengwa weefe Yesu Kurisito owabitira mu Kurisito ohutuŋa hiisi kabi ejomwigulu.

⁴ Hatonda n'ahiiri hutonda ehyalo gaatutobola, n'abita mu Kurisito, hube bagwalaafu ni hunumaho hamogo mu moni jije. Olw'ohutwenda,

* **1:1 1:1** Ebyanjandihwa ebindi sibiroma biiti "mu hibuga Efeeso."

⁵ gasalaŋo ohuŋwa ahale nahale ohutufu-
ula baana babe n'abita mu Yesu Kurisito
olw'ohusiima huhwe,

⁶ c'ehigira huli n'ohumujumirya
olw'ehisasabirisi hihye ehi gatunja n'abita mu
Mwana wuwe oyo omuhoda.

⁷ Kurisito ni gafa, amafugi gage gatununula
ng'atusonija ebibi. Ehisasabirisi hya Hatonda

⁸ ehi gatuyomboolera hyatunja amagesi ohu-
faania etegeha yiye.

⁹ Era gatuhwehulira ehyama ehi gaali
n'ategehire ohwoheresa n'abita mu Kurisito.

¹⁰ Etegeha yiye yiri yiiti ehiseera ni hyolire,
aleete ŋalala ebiitu byosibyosi ebiri mwigulu
nohu hyalo, ŋaasi w'obunugi wa Kurisito.

¹¹ Olwa Kurisito, Hatonda gatutobola gaahena
gatwabula ohuba abaatu babe ng'olu genda era
ahola byosibyosi ni geema hu tegeha yiye yira
eya halehale,

¹² ko efe Abayudaaya abehereeye ohuba
n'esuubi mu Kurisito, humujumirye era humuŋe
eŋono.

¹³ Era enywe Abatali Bayudaaya mwesi Ha-
tonda gabafuula abaatu babe ni mwanulira
amazima, nj'Amanuliro Amalaŋi agaŋamba hu
hunonoha. Ni muhenire ohufugiirira Kurisito,
gaabaŋa Omwoyo Omutukuvu oyu gabasuubisa
ohuŋwa ahale nahale ohulaga ati muli babe.

¹⁴ Omwoyo oyo nj'ahabonero ahahahasa haati
Hatonda alitunja ebi gasuubisa abaatu babe era
ti aja hutununula, leha humujumirye olw'eŋono
lirye.

Ohweyaasa n’ohusaba hwa Pawulo

¹⁵ Olw’ehyo, ohuŋwa olu n’anjulira ti mufugi-
irira Yesu Musengwa era mwenda abagwaalafu
bosibosi,

¹⁶ sindeherangaho ohweyaasa Hatonda hu
lwenywe mu husaba hwange.

¹⁷ Mbasabira ti Hatonda wa Musengwa weefe
Yesu Kurisito era Seefe owenono, abaje Om-
woyo Omutukuvu ko mwahaba n’amagesi mu-
mutegeere bulaji.

¹⁸ Era saba ti emoni jenywe ejomu hida jirim-
buhe mufaanie ebiitu eby’amaani ebi Hatonda
gabalangira era mulindirire ni ŋaŋuma hubuus-
abuusa ebi gasuubisa abaatu babe.

¹⁹ Saba ti mutegeere amaani gage amabitiirifu
ohuhira gosigosi era agatuyeeda efe abafugiirira.

²⁰ Amaani ameene ago, nj’agalamusa Kurisito
ng’ahena gehala mu hifo ehy’enono hu lubega
lw’omuhono omulungi ogwa Hatonda mwigulu.

²¹ Kurisito oyo ali ŋamugulu w’obuŋangi
n’abanugi era aŋuga abanamaani n’abahombe
bosibosi, siŋahani hyonene aye emirembe
n’emirembe.

²² Hatonda gaata ebiitu byosibyosi ŋaasi
w’obuŋangi wa Kurisito, ng’amufuula Musen-
gwa[†] era aŋuga hiisi hiitu olw’abo abamufugi-
irira.

²³ Abafugiirira abo, nj’omubiri gwa Kurisito
era nj’aletera hiisi hiitu ohuba n’obulamu.

2

[†] **1:22 1:22** Oba “omutwe.”

Hwafuuha balamu hulwa Kurisito

¹ Ni mwali ni muhiiri hufugiirira Yesu, mwali bafu mu mwoyo olw'ebibi byenywe.

² Mwalondereranga esambo embi ej'ehyalo hino, ni mudembuhira Sitaani, omwoyo ogunuga na mugulu mu bbanga. Hatyane, omwoyo jana ogwo nj'ogunuga abo abajeemera Hatonda.

³ Ohwegomba ohw'omubiri n'epeega yeefe embi ni bitunuga ng'olu byali ni binuga abaatu abandi. Era olw'ebibi ebyo, hwesihwesi Hatonda gaali atuliho ehirunji.

⁴ Aye Hatonda olw'ohutwenda obugali n'olwehisa hihye exhibitirifu,

⁵ gatulamuhisa nalala ni Kurisito ohunwa mu bujeemu omu hwali ni hufiiriyeye, gatunonola olw'ehisasabirisi hihye.

⁶ Hatonda gatulamuhisa nalala ni Yesu Kurisito era ng'atwihasa ni naye mwigulu olwohuba huli hirala ni naye.

⁷ Gaahola ehyo ohulaga abomu mirembe ejiribanjo obulani n'ehisasabirisi hihye exhibitirifu ehi gatunambira mu Yesu Kurisito.

⁸ Mwanonoha olw'ehisasabirisi hihye olu mwamufugiirira, olwohuba ohunonoha simaani genywe aye hirabo hya Hatonda.

⁹ Hatonda sigabanonola olw'ebikolwa byenywe ebirani olw'ehyo nanjume owepaahapaaha.

¹⁰ Hatonda gatutonda n'abita mu Yesu Kurisito ohuholanga ebirani ebi gatutegehera.

Obulala mu Kurisito

11 Olw'ehyo, enywe Abatali Bayudaaya era "abatali bahomole" ng'olu Abayudaaya babalanga olwohuba mbo nibo bahomole, (ohuhomola ohu baatu bahomola n'engalo)* muhebulire ehi mwali mu biseera ebyahale.

12 Mwali munuma Kurisito era simwali baatu ba Hatonda, ni batababalira hu gwanga ery'Abayisirayiri, abaatu ba Hatonda era ni munuma mugabo mu ndagaano ejirimo ebi Hatonda gasuubisa. Mwali munuma suubi lyosiryosi era ni munuma Hatonda omwene bunangi.

13 Aye naahani ohubita mu hufa hwa Yesu Kurisito, enywe abaali ni mwedanyiriiye analeeni, Hatonda gabeegeresa huupi olw'amafugi ga Kurisito.

14 Kurisito galeeta emiyaaya, gaagira Abayudaaya n'Abatali Bayudaaya hwaba muutu mulala, gatusano obulabe owaali hy'ehitepe ni butwabuujula.

15 Olu gafa hu musalabba, gadibya ebiragiro n'amagambi g'Ehiyudaaya ko afaananie Abayudaaya n'Abatali Bayudaaya ohuba egwanga erala era enyaaha mu moni ja Hatonda, mu kola eyo galeetano emiyaaya.

16 Ohufa huhwe hu musalabba hwatufaanania ni Hatonda hwatusano obulabe ngati w'Abayudaaya n'Abatali Bayudaaya, hwesihwesi hwagobola nalala.

17 Kurisito gaaja gabalomera enywe Abatali Bayudaaya abaali analeeni ni Hatonda

* 2:11 2:11 Mag 10:16. Nalinjo ohuhomola ohundi ohw'omwoyo.

n'Abayudaaya abaali ohuupi ni naye, Amanjuro Amalanji.*

¹⁸ Naahani hwesihwesi hubita mu Kurisito oyo ko hwola eyiri Hatonda Seefe olw'amaani g'Omwoyo wuwe.

¹⁹ Olw'ehyo, enywe Abatali Bayudaaya simuhiri balugendwa aye muli b'ehiha hiralala n'abaatu ba Hatonda era abomu nyumba yiye.

²⁰ Enywe muli nyumba eyi baatongola hu musingi gw'esomesa y'abahwenda n'abanaabbi, Yesu Kurisito omwene n'ali nj'ebaale eryomu sonda era ery'omugaso.

²¹ Kurisito nj'anambiriye enyumba eyo yosiyosi era nj'agira yagalama yaba Yekaalu enjabufu eya Musengwa.

²² Mu Kurisito, enywe mwesi Abatali Bayudaaya, babatongolera njalala ni neefe Abayudaaya ohuba enyumba omu Mwoyo wa Hatonda amenya.

3

Pawulo abuulira mu Batali Bayudaaya

¹ Ese Pawulo, bambona hu lwenywe Abatali Bayudaaya olwohuba pereesa Yesu Kurisito.

² Mbalomera ti ng'olu mwanjuro, Hatonda gaapambira ehiasabirisi gaapa omulimo ogw'ohulomera Abatali Bayudaaya Amanjuro Amalanji.

³ Ko huloma gakwehulira ehyama hihye ng'olu pandiihire mu buupi.

* **2:17 2:17** Yis 57:19

⁴ Mu husoma ebbaluṅa yino, muja hufaania ng'olu Kurisito nj'ehyama ehyo.

⁵ Hatonda sigahwehulira abomu mireembe ej'ahale ehyama ehyo, ng'olu hiri ṅaahani n'abita mu Omwoyo Omutukuvu eyiri abahwenda n'abanaabbi babe abagaabula ohumuṅeeresa.

⁶ Ehyama hiri hiiti, Amanḅuliro Amalaṅi gagira Abatali Bayudaaya basuna omugabo ṅalala n'Abayudaaya hu hisuubizo hya Hatonda ohubanoṅola. Era bosibosi mubiri mulala ohubita mu Yesu Kurisito.

⁷ Olw'ehisasabirisi hya Hatonda, gaapa ekabi ohuba omumuṅeeresa ohulomera abaatu Amanḅuliro Amalaṅi gano olw'amaani gage.

⁸ Wayire ndiise ow'edaala erya ṅaasi mu abaatu ba Hatonda bosibosi aye gaapa ekabi ohulomera Abatali Bayudaaya Amanḅuliro Amalaṅi agaṅamba hu buṅinda obubitiirifu obuli mu Kurisito.

⁹ Era Hatonda oyo owatonda hiisi hiitu, gaatumu ohulomera abaatu bosibosi ebiṅamba hu hyama ehyo ehi gaali n'ahwehire ohuṅwa ahale nahale.

¹⁰ Ehigendererwa hihye hiri hiiti ṅaahani n'abita mu abafugiirira Kurisito, balomere emisambwa n'abanamaani abali mu bbanga ebiṅamba hu magesi gage amangi agatanḅwayo.

¹¹ Ohunoṅola abaatu, nj'eyaali etegeha ya Hatonda ko atonde ehyalo era gayoheresa n'abita mu Musengwa weefe Yesu Kurisito.

¹² ṅaahani ni hubita mu Kurisito oyo olw'ohumufugiirira, hwigerera eyiri Hatonda

n'obugumu.

¹³ Olw'ehyo, mbegayirira mutanjwamo maani olw'ohungudya ohubangudya hu lwenywe, olwohuba hyasuno eyi muli.

Ohumanya ohwenda hwa Kurisito

¹⁴ C'ehigira kubbira Hatonda seefe amafuha ni mbasabira,

¹⁵ Hatonda oyo nj'owatonda ebiitu byosibyosi mwigulu nohu hyalo.

¹⁶ Saba ti Hatonda ow'ejono ery'amaani, abanje amaani gage n'abita mu Mwoyo wuwe.

¹⁷ Era saba ti mufaanie ng'olu Hatonda abenda bugali weene era Kurisito amenye mu mwoyo jenywe olw'ohumufugiirira ko musigale ni muli bagumu,

¹⁸ ko enywe njalala n'abagwalaafu abandi bosi-bosi, munjange ohufaania ohwenda hwa Kurisito ng'olu huli hw'amaani.

¹⁹ Era mumanye ohwenda hwa Kurisito ohwo eyiri abaatu, ohwenda ohu omuutu atanjanga hufaania mu magesi gage ag'obuutu ko mube n'obulamu obu Hatonda genda.

²⁰ Naahani Hatonda oyo ali n'obujangi ohuhola n'ohuhiraho ebi humusunga n'ebi hujeeega, olw'amaani gage agaholera mu efe.

²¹ Abamufugiirira banjenga Hatonda ejono ohubita mu Yesu Kurisito emirembe n'emirembe. Amiina.

4

Huli mubiri mulala mu Kurisito

1 Ng'omuutu oyu baabonja olw'ohuñeerese Musengwa, mbegayirira mube n'esambo ejoolana n'obulamu obu Hatonda gaabalanga ohuba ni nawo.

2 Mube abaatu abatetulirisa, mwenomehe era hiisi muutu gehalirihenga owahye olw'ohwendana.

3 Mufubengaho ohweyongera ohuloma hirala, Omwoyo wa Hatonda n'ali nj'abayeeda ohumenya ñalala mu miyaaya.

4 Huli mubiri mulala, n'Omwoyo wa Hatonda mulala ng'olu hihusuubira ohusuna, hiri hirala.

5 Ñaliño Musengwa mulala n'obuhwenda bulala obu hufugiirira ko n'ohubatiziwa hulala ng'ahabonero ahalaga haati huli hirala ni Kurisito,

6 Hatonda, Semwana w'abaatu bosibosi mulala anjuga ebiitu byosibyosi, aholera era amenya mu hiisi muutu wuwe amufugiirira.

7 Kurisito gaña hiisi muutu ehirabo ehy'enjabulo ng'olu omwene asiima.

8 C'ehigira ehyanandiihiwa hiroma hiiti,

“Gañangula abasigu era ni gatiina mu hifo ehya ñamugulu obugali gaña abaatu ehirabo.”*

9 Hitegeesa hi ohuloma oti gatiina mu hifo ehya ñamugulu obugali? Hitegeesa hiiti geheerera ohwiha ñaasi hu hyalo.

10 Oyo oweeha, nj'omwene oyo owatiina mwigulu ña mugulu obugali ohuhiraho ebireri ko amaamire hiisi hiitu.

* 4:8 4:8 Zab 68:18

11 Era nj'omwene oyo owanja abaatu ebirabo. Abandi gaabana ohuba abahwenda babe, abandi ohuba abanaabbi, abandi ohuba abalomera abaatu Amanjuro Amalani, abandi ohuba abaayi ko n'ohusomesa abaatu ba Hatonda.

12 Ehyo Kurisito gahihola ni genda batendehe abaatu babe mu mulimo gw'ohumunjeesa ko omubiri gugwe guhule,

13 ohwola hwesihwesi olu huliba hy'omuutu mulala mu hwesiga n'ohumanya Omwana wa Hatonda, hunangale mu by'omwoyo hube hya niye.

14 Anjo sihunaahabe hy'abaana abanjere abacuuhacuusa anja naanja olw'esomesa ey'obudulingi era egodamya abaatu.

15 Aye hube b'amazima era hwendane ko huhule mu hiisi ngeri hya Kurisito omutwe gwefe abamufugiirira.

16 Kurisito oyo aleetera omubiri gwosigwosi ohwenjimba njalala, hiisi muutu n'ahola omulimo gugwe ko omubiri gwosigwosi gwahula olw'ohwendana.

Obulamu obunyaaha mu Kurisito

17 Mutege ohutwi mbalomere hino olw'obunangi wa Musengwa era leha mbanje hu magesi ti mulehere anjo ohwebisya hy'abaatu abali n'epeega embi abatafugiirira Hatonda.

18 Obulamu waawe wijuuye ehiirema era banuma mugabo ogw'obulamu obutanwanjo olw'obunanyi n'obuhahanyafu w'emyoyo jaawe.

¹⁹ Banjuma n’esoni era banjera mu huhola eby’obujemu. Bali n’omulungo ohuhola ebibi ebya hiisi ngeri anajuma hwemoota.

²⁰ Aye enywe sibabasomesa baatyho hu Kurisito.

²¹ Mu butuufu, mwanjulira obuhwenda ow’amazima obujamba hu Yesu.

²² Ng’olu babasomesa, mwefihule obulamu obuhale owijuuye ohwegomba ohw’obudulingi obu mwalimo ni muhiiri hufugiirira Yesu.

²³ Mwambale obulamu obunyaaha ohujwa ewa Hatonda, mufuuhe banyaaha nomu binjeego byenywe,

²⁴ era mube baatu abanyaaha aba gatonda mu hifaananyi hihye ohubeera erala abagwalaafu era abamusangaasa.

²⁵ Olw’ehyo, mulehe obudulingi, hiisi muutu alomenga amazima olwohuba huli mubiri mulala.

²⁶ Nanabano ehibalunja, mwehuumenga ohutabaleetera huhola hibi. Mutagwisanga eryuba ni muhiirunjire,*

²⁷ era mutanjanga Sitaani ebbanga ohubahema ohuhola ehibi.

²⁸ Omwibi alehere ano ohwiba aye abeho n’ehyehola anange ohuyeedaho abo abagadi.

²⁹ Mwenjalame endoma embi aye ebibono byenywe bibe ebiyeeda abo ababinjulira.

³⁰ Era mutenjnamisanga Omwoyo wa Hatonda olwohuba nj’ahabonero ahalaga haati balibanunula hu ludaalo olw’ekomero.

* **4:26 4:26** Zab 4:4

³¹ Mwenjalenga ohuba abaatu abehabyo n'oluswa. Mutanayirisanga oba ohujalatana n'omuutu yesiyesi.

³² Aye hiisi muutu alumirwenga era asoninenga owahye ng'olu Hatonda gabasoninja n'abita mu Kurisito.

5

Ohuba mu njase

¹ Njaahani ng'olu muli abaana ba Hatonda abahoda, leha abe ehy'ohuboneraho mu bulamu wenywe,

² era mwendanenga ng'olu Kurisito gatwenda geenayo gafa hu lwefe ohuba enjongo erisangaasa Hatonda.

³ Mutaholanga obuhwedi oba omuutu yesiyesi ohuba n'emoni enyangu oba ayayaanira ebibi by'ehyalo hino. Ebiitu hy'ebyo, sihiranji ohuba mu abaatu ba Hatonda.

⁴ Mutalomanga eby'obunemu wayire ohumooa ohwehisirusiru aye mweyaasenga hweyaasa Hatonda.

⁵ Hino muhimanyire erala muuti njanuma muhwedi wayire oyo aholo eby'obunemu oba eby'obudakaani oba anemberesa hu ebibi by'ehyalo hino, ko nj'ohujumirya ebitali Hatonda, alisuna omugabo mu bunjugi wa Hatonda ni Kurisito.

⁶ Omuutu yesiyesi saabadulinganga ati Hatonda afugiirira ebiitu hy'ebyo, olwohuba aligudya abajeemu, n'ehirunji.

⁷ Olw'ehyo, mutaholanga muhumba n'abaatu hy'abo.

8 Ni muhiiri hufugiirira Kurisito, mwagenderanga mu hiirema aye ŋaahani ng'olu muli n'omuhumba ni Musengwa, mugenderanga mu njase olwohuba muli baatu b'enjase.

9 Hiri hiityo olwohuba enjase nj'egira omuutu gaahola ebirani, ebirunamu era eby'amazima.

10 Era mugesyengaho ohuhola ebisangaasa Musengwa.

11 Mutaholanga ebiitu eby'ehiirema olwohuba biŋuma ehi biyeeda aye mubyanihenga hubyaniha.

12 Hiŋambya n'esoni ohuloma hu ebyo ebi bajeemu bahola mu ngiso.

13 Aye enjase enahubba mu hiirema, ebiitu byosibyosi ebyomu hiirema biboneherera,

14 olwohuba enjase nj'egira hiisi hiitu hyaboneha. C'ehigira baloma baati,

“Sisimuha ewe oli hy'ofuluuta,
era ewe oli hy'omufu lamuha onwe mu bafu,
era onahola otyo, Kurisito aja hu huhwaduhisa
enjase.”

15 Mwegenderesenga, mutebisyanga hyabanubeebe aye hy'abali n'amagesi.

16 Mutambisenga hiisi kabi eyi muba ni nayo bulani ohuhola ebirani olwohuba omulembe guno mubi.

17 Olw'ehyo, mutaba hy'abatategeera aye mu-faanie ehi Musengwa genda.

18 Era mutameeranga olwohuba ehyo hija hu bonoona aye mulehe Omwoyo Omutukuvu abamaamirenga.

19 N'omwoyo mulala, mwemberenga Musengwa e Zabbuli n'enyembo ej'ohumujumirya, n'eki Mwoyo abana ohuseega.

20 Era habuhyabuhya mweyaasenga Hatonda Seefe olw'ebiiitu byosibyosi, ebi Musengwa weefe Yesu Kurisito gaatuholera.

Abasinde n'abahasi baawe

21 Hiisi muutu anjulirenga owahye olw'ohuna Kurisito enono.

22 Abahasi, mujulirenga abawamwenywe ng'olu mujulira Musengwa,

23 olwohuba omusinde nj'omutwe gw'omuhasi wuwe ng'olu Kurisito ali nj'omutwe gw'abamufugiirira, omwene n'ali nj'Omunonosi waawe.

24 Ng'olu abafugiirira bagondera Kurisito, n'abahasi boosi banjulirenga abawamwawe mu hiisi hiitu.

25 Abasinde, mwendenga abahasi benywe ng'olu Kurisito gendire abamufugiirira era geenayo gafa hu lwawe,

26 gabagwalaasa n'abooga n'amaaji, nj'ehibono hihye,

27 ko abamufugiirira abo, babe bagwalaafu eyi ali ni banumaho hamogo wayire mbalo oba efunyi.

28 Mu ngeri nj'enyene, n'abasinde mwesi mwendenga abahasi benywe ng'olu mweyenda mwabeene. Owenda omuhasi wuwe aba geyenda.

29 Nanuma kadi mulala owerya olubeje aye geeriisa era geerabirira ng'olu Kurisito alabirira abamufugiirira,

³⁰ olwohuba huli mubiri gugwe.

³¹ Hyanandiihiwa hiiti, “Olw’ehyo, omusinde analehenga semwana ni nyina, genimba n’omuhasi wuwe nga bombi bafuuha mubiri mulala.”*

³² Hino hyama hihulu era hiraga ng’olu Kurisito n’abamufugiirira bali omuutu mulala.

³³ Ale, hiisi musinde gendenga omuhasi wuwe ng’olu geyenda omwene era n’omuhasi yeesi anjenga wamwe enono.

6

Abasaaye n’abaana baawe

¹ Abaana, mudembuhirenga abasaaye benywe hulwa Musengwa, olwohuba ehyo hiraŋi.

² “Onjanga lataawo ni maawo, enono,” lino nj’egambi edaayi eriri n’ehisuubiso ehiroma hiiti,

³ “Ko ebiitu bihutiinire bulani era owangaale hu hyalo.”

⁴ Abasaaye mutanyigisanga baana benywe aye mubasomesenga ebi Musengwa genda.

Abeedu n’abasengwa baawe

⁵ Abeedu, mudembuhirenga abasengwa benywe era mubanenga enono n’omwoyo mulala ng’olu mwahadembuhiye Kurisito.

⁶ Ehyo mutahiholanga olwohuba babataayeho emoni aye muhiholenga ni muhenereeye ng’abeedu ba Kurisito olwohuba ehyo nj’ehi Hatonda abendaho.

* 5:31 5:31 Tand 2:24

7 Muñeeresenga abasengwa benywe n'omwoyo omulala hy'abañeeresu Musengwa omwene sosi abaatu,

8 olwohuba muhimanyire muuti Musengwa aja huña hiisi muutu omuhemba, haabe mwidu oba bbe, ni geema hu hiisi hirañi ehi ahola.

9 Ni nenywe abali n'abeedu, mubabisyenga bulañi ni ñañuma hubahayula hiisi aja naaña. Muhebulire muuti Musengwa yenywe mwes-imwesi ali mwigulu era ñañuma oyu aboola.

Ebisoosa eby'abafugiirira Kurisito

10 Ehisembayo, mube badimamu hu lw'amaani ga Musengwa.

11 Mwambale ebisoosa byosibyosi ebi Hatonda abaña ko muñange ohuñirirania ekwe ja Sitaani.

12 Sihunirirana n'abaatu bahyefe abali n'omubiri n'amafugi aye n'abanugi, n'abanamaani, n'amaani g'ehiirema agali mu hyalo muno ko n'obunugi w'emisambwa ejinugira mu bbanga.

13 Olw'ehyo, mwambale ebisoosa bya Hatonda ko muñange ohuñirirania ekwe ja Sitaani n'abawagaaye.

14 Naahani mwemeerere ni mwesidihire amazima mu hihunya ng'olu muutu geeboña omusipi, n'ebikolwa ebirañi bibe hy'ehyohwambala ehi musirikale gambala mu hifuba ohwehumisa mu lutalo.

15 Mwambale engayito ohulaga ohwetegeha ohulomera abaatu Amanjulo Amalanji engeri eyi banjanga ohusunamo emiyaaya ja Hatonda.*

16 Ohumeeda hu ebyo byosibyosi, mube n'ohufugiirira hy'engabo ko munange ohwehuuma obusaale wa Sitaani obuli hy'omuliro owalasa.

17 Mwambale obunonosi hy'ekofira eyi omusirikale gambala era munambe ehiono hya Hatonda ehi Omwoyo abanja hibe hy'epiima ohusoosa omusigu.*

18 Mu lutalo luno, Omwoyo abatangirirenga mu husaba ohwa buli hiha habuhyabuhya. Era mube butebute, mutaleheranga husabira abaatu ba Hatonda bosibosi.

19 Keesi musabirenga, Hatonda gaape ehy'ohuloma era ndomere abaatu n'obugumu, ehyama ehiri mu Amanjulo Amalanji.

20 Ndi mu komera olw'ohulomera abaatu Amanjulo Amalanji. Musabireho mbe n'obugumu mbuulire ng'olu hyahali.

Obuheese

21 Mulebe yeefe omuhoda oyu balanga baati Tukikasi era omunjeeresa omwesigwa owa Musengwa, aja hu balomera hiisi ebiifaho n'ebi kola.

22 C'ehigira ndihumutuma eyo olw'esonga enyene eyo ko mumanye ng'olu huli era abagobosemo n'amaani.

* 6:15 6:15 Yis 52:7 * 6:17 6:17 Yis 59:17

²³ Hatonda seefe ni Musengwa Yesu Kurisito, babanje emiyaaya n’ohwenda era babayeede ohuba n’ohufugiirira.

²⁴ Hatonda abanjambire ehisasabirisi, enywe mwesimwesi abenda Musengwa weefe Yesu Kurisito n’omwoyo mulala.

**Endagaano Epyaha ko n'ebitabo ebindi
eby'Endagaano Ekayire mu Lunyole
Nyole: Endagaano Epyaha mu Lunyole (Bible)**

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

This is the New Testament in Lunyole of Uganda, with 10 books from the Old Testament.

All rights reserved.

2025-05-17

PDF generated using Haiola and XeLaTeX on 17 May 2025 from source files dated 17 May 2025

e00787cd-838f-597a-9477-00b97e4e2cff